

PAGTULON-AN 12 — ILALUM NA SA KASUGOAN DIHA SA DALAN SA SAAD (Numeros 8-14)

KATUYOAN: Sa pagpakita nga aduna lamay usa ka manlalaban (tigpataliwala) taliwala sa Dios ug tawo.

Mahadlok ba ikaw sa mga P.C. kon moanha sila sa imong panimalay? Dili kon wala ka magbuhat ug dautan apan pananglitan supak sa balaod ang imong ginabuhat sa pag-anha niya, mahadlok gayud ikaw. Nakabati ako nga dihay usa ka bata nga lalake nadakpan kay nangawat ug biseklita. Ang sarhento andam na sa pagdala kaniya ngadto sa estasyonan sa polisya apan niadto usab nga taknaa miabut ang amahan sa bata. Ang amahan nangamuyo ngadto sa sarhento nga buhian lamang ang iya nga bata ug siya na ang mosilot sa iyang anak. Busa ang bata nakalingkawas sa hukmanan ug bilangoan. Ang iyang amahan mao ang nahimo nga manlalaban kaniya ug sa silot sa balaod.

Ateng makita nga sa magapanaw kita sa MATAAS NGA DALAN SA KINABUHI makaplagan nato nga ang mga Israelista nagkinahanglan usab ug manlalaban. Dihay silot nga nagauban kapunay kon supakon ang kasugoan. Apan adunay daku nga panalangin nga gisaad sa Israel kon ila nga bantayan ang kasugoan apan mas daghan usab ang mga tunglo nga magaabut sa Israel kon ila nga

supakon ang kasugoan, Deuteronomio 28.

1. Human gihatag ang kasugoan sa bukid sa Sinai ang Dios nagapakigsulti diha sa halaran sa pagpasig-uli sa mga paagi unsay pagabuhaton sa mga Israelitas samtang sila magapanaw, Numeros 7:39-9:23.

a. Ang mga levihanon mao ang magadumala sa Tabernaculo: ilang pagapatunggon ang trumpeta alang sa pagtawag sa mga katawhan kon sila maghimo ug pagtigom.

b. Ang panganud nga nagalandong (mahimong kalayo kon magabii) mao ang magamando sa mga katawhan sa Israel.

2. Mibiya sila sa Sinai ug miadto sa kamingawan sa Paran, Numeros 10:11-36.

a. Midangat sila sa Taberah ug ang mga katawhan nagbagolbol. Ang kalayo ni Jehovah milamoy kanila; si Moises nag-ampo kang Jehovah ug ang kalayo napalong, Numeros 11:1-3. Si Moises mao ang manlalaban taliwala sa Israel ug sa nagligutgut nga Dios.

b. Midangat sila sa Haseroth, si Meriam ug Aaron mibati ug kasina ni Moises. Gilibak nila si Moises ug si Meriam gihampak sa Dios pinaagi sa sanla. Si Moises nangaliyupo sa Dios alang kaniya ug siya naayo. Ug niini nga paagiha si Moises nahimo nga tigpataliwala, Numeros 12:1-16.

c. Nagkampo sila sa Cades ug si Moises nagpadala ug mga maniniid ngadto sa yuta sa Canaan. Nagpadala siya ug 12 ka mga maniniid, tagsa sa matag banay sa Israel, Numeros 13. Human sa 40 ka adlaw namauli sila uban sa ilang mga taho.

(1) Nagpakita sila sa mga bunga sa yuta ug nagsugilon, "Ug sa pagkatinuod, kini nagaagay sa gatas ug dugos." Ug nagingon sila nga ang mga katawhan nga nagapuyo niadtong yutaa mga kusgan ug ang kalungsuran gilibutan sa mga malig-on nga paril. Among nakita ang mga anak ni Anac (higante) nagapuyo didto.

(2) Apan si Caleb ug Josue miingon, "Manungas kita dayon ug manag-iyu niini."

(3) Ang napulo ka mga maniniid miingon, "Dili kita makahimo sa pagtungas batok niadtong katawhan; kay sila labi pang kusgan kay kanato."

d. Ug ang mga katawhan nanagbagolbol pag-usab, Numeros 14:1-39. Nanagsinggit sila batok kang Moises ug batok sa Ginoo. Naninguha sila sa pagpili ug usa ka pangulo aron mamalik ngadto sa Egipto. Si Moises ug si Aaron mihapa atubangan sa katilingban apan ang mga katawhan andam sa pagsalibay kanila sa bato.

Ang himaya sa Ginoo mipakita diha sa Tabernaculo atubangan sa mga Israelitas. Ang Ginoo miingon kang Moises, "Hangtud anus-a nga magatamay kanako kining katawhan? Ug hangtud anus-a nga sila dili motoo kanako. Ako magapatay kanila uban ang hampak sa kamatay, ug sila akong isalikway aron dili maka-panunod, ug pagabuhaton ko ikaw nga usa ka nasud nga labi pang daku ug labi pang kusgan kay kanila." Numeros 14:11,12.

Si Moises nangaliyupo pag-usab alang sa mga katawhan ug ang Dios mitubag ug nag-ingon nga si Caleb ug Josue mao lamang ang makasulod ngadto sa yuta sa Saad; ug silang tanan magalibud-libud sa kamingawan sulod sa kap-atan (40) ka tuig. Ang mga maniniid nga wala managpanoo nangamatay sa makalilisang nga castigo.

Ang Israel takus nga pagapalaon tungod sa ilang pagkadili matinoohon. Sumala sa atong giya, nga basahon, ang Biblia, "Ang tanan nanagpakasala..." "Ang bayad sa sala mao ang kamatayon." Roma 3:23; 6:23. Ang Dios batok sa mga dautan ug may kaligutgut sa matag adlaw, Salmo 7:11. Apan sa mga makasasala pa kita si Cristo namatay alang kanato, Roma 5:8. Ug karon buhi Siya nga nagapangamuyo alang kanato, Hebreohanon 7:25. Si Cristo mao ang atong manlalaban taliwala sa Amahan. Nagabarug Siya sa pagpataliwala kanato sa kasuko sa Dios tungod sa sala. Nakita na nimo nga si Maria dili mao ang manlalaban taliwala ni Cristo alang kanato, tungod kay aduna lamay usa ka manlalaban ug siya mao si Jesu-Cristo. Si Cristo mao ang magakuha sa atong silot pinaagi sa kamatayon sa krus ug karon kon atong dawaton Siya nga atong bugtong manluluwas, mamaluwas gayud kita.

Ato nang nahibao-an karon kon sa unsang paagi si Moises naghulagway kang Cristo tungod kay gihulagwayan na niya nga daan ang buhat ni Cristo sa pagkamanlalaban. Si Cristo mao lamang ang bugtong Manlalaban taliwala sa Dios ug sa mga tawo. Imo na ba Siya nga manlalaban karon?

SAG-ULOHON: "Kay adunay usa ra ka Dios, ug adunay usa ra ka tigpataliwala sa Dios ug sa mga tawo, nga mao ang tawo nga si Cristo Jesus; nga naghatag sa iyang kaugalingon ingon nga lukat alang sa tanan, nga ang panghimatuod niini nahimo na sa

gitagal nga panahon." 1 Timoteo 2:5-6.

PAGTULON-AN 12 — PAGATUBAGON

1-2-3. Samtang ang mga Israelitas mingpanaw human gihatag ang kasugoan, atong nakita nga adunay mga paghukom nga nagasunod kon supakon ang kasugoan. Ibutang diha sa blanko sa ubos ang mga ulohan.

NABUHAT NGA SALA GISILOTAN SA MAONG SALA

1. Numeros 11:1 _____ Numeros 11:1 _____

2. Numeros 12:1 _____ Numeros 12:10 _____

3. Numeros 14:11 _____ Numeros 14:12 _____

4. Unsa man ang ginabuhat ni Moises alang sa mga katawhan sa mao nga sala? Numeros 11:2; 12:13; 14:19.

5. Si Moises mao ang tigpataliwala (manlalaban) taliwala sa nagligutgut nga Dios ug makasasala nga katawhan. Kinsa man ang ngalan niadtong usa ka tawo nga nagapabilin nga buhi nga maoy tigpataliwala (mangaliyupo) alang kanato? Hebreohanon 7:22-25.

6. Isulat diha sa blanko sa pagpakita ngano nga ang mga niluwas nga katawhan nagkinahanglan nga si Cristo mangaliyupo alang kanila. 1 Juan 2:1. "Minahal ko nga anak, nagsulat ako kaninyo niining mga butanga aron kamo _____ apan kon may _____ kita adunay manlalaban nga mangatubang sa Amahan, Si Jesu-Cristo ang matarung."

7. Ngano nga ang tanan nga mga katawhan takus pagasilotan? Roma 3:23 _____

8. Unsa man ang gihimo ni Cristo sa mga makasasala pa kita? Roma 5:8 _____

9. Isulat diha sa mga blanko ang mga dagkung buhat ni Cristo nga nagpaila sa Iyang pagka manluluwas.

(1) Ang Iyang gihimo alang sa mga dili luwas, 1 Timoteo 1:15. Kasaligan ug takus pagadawaton sa bug-os ang ginaingon, nga si Cristo Jesus mianhi sa kalibutan aron sa _____

(2) Ang Iyang ginahimo alang sa mga luwas, Hebrèohanon 7:25.
Busa sa tanang panahon, siya arang _____
_____ pinaagi Kaniya; sanglit buhi man Siya
kanunay aron sa _____ alang kanila.

10. Isulat nga SINAG-ULO ang 1 Timoteo 2:5.
